

DOMINICA ULTIMA OCTOBRI  
D. N. Jesu Christi Regis

DUPLEX I CLASSIS

IN I VESPERIS

Antiphona 1



ACÍFICUS † vocábitur, et  
thronus ejus erit fir-  
missimus in perpétuum.

Ps. 109 Dixit Dóminus

Dómino meo, cum reliquis de Do-  
minica.

2 Regnum ejus † regnum sempitér-  
num est, et omnes reges sérvient ei et  
obédient.

3 Ecce Vir Oriens † nomen ejus:  
sedébit et dominábitur, et loquétur  
pacem géntibus.

4 Ecce dedi te † in lucem géntium,  
ut sis salus mea usque ad extrémum  
terræ.

Capitulum

Col 1:12-13

F RATES: Grátias ágimus Deo Patri,  
qui dignos nos fecit in partem sor-  
tis sanctórum in lúmine, qui eripuit  
nos de potestáte tenebrárum, et trán-  
stulit in regnum Filii dilectiónis suæ.

℞. br. Afférte Dómino, \* Famíliæ  
populórum. Afférte. ʒ. Af-  
férte Dómino glóriam et impérium.  
Famíliæ. Glória Patri. Afférte.

Hymnus

T E sæculórum Príncipem,  
Te, Christe, Regem géntium,

Te méntium, te córdium  
Unum fatémur árbitrum.

Scelésta turba clámitat:  
Regnáre Christum nólumus:  
Te nos ovántes ómnium  
Regem supréum dícimus.

O Christe, Princeps Pácifer,  
Mentes rebélles súbice:  
Tuóque amóre dévios,  
Ovíle in unum cóngrega.

Ad hoc cruénta ab árbore  
Pendens apértis brácciis,  
Diráque fossum cúspide  
Cor igne flagrans éxhibes.

Ad hoc in aris ábderis  
Vini dapísque imágine,  
Fundens salútem filiis  
Transverberáto péctore.

Te natiónum Præsides  
Honóre tollant público,  
Colant magístri, iúdices,  
Leges et artes éxprimant.

Submissa regum fúlgeant  
Tibi dicáta insígnia:  
Mitíque sceptro pátriam  
Domósque subde cívium.

Glória tibi, Dómine,  
Qui scepra mundi témperas,  
Cum Patre, et almo Spíritu,  
In sempitérna sæcula. Amen.

Sic terminantur omnes Hymni usque ad  
Completerium sequentis diei inclusive.

Ÿ. Data est mihi omnis potestas.

Ř. In cælo et in terra.

**Ad Magnif. Aña** Dabit illi † Dóminus Deus sedem David, patris ejus: et regnabit in domo Jacob in ætérnum, et regni ejus non erit finis, allelúja.

### Oratio

**O**MNÍPOTENS sempitérne Deus, qui in dilécto Filio tuo, universórum Rege, ómnia instauráre voluísti: concéde propítius; ut cunctæ familiæ géntium, peccáti vúlnerē disgregátæ, ejus suavíssimo subdántur império: Qui tecum vivit.

**Et fit Commemoratio Dominicæ occurrentis.**

### AD MATUTINUM

**Invit.** Jesum Christum, Regem regum: \* Veníte, adorémus. **Ps. 94**  
Veníte, exsultémus.

### Hymnus

**Æ**TÉRNA Imago Altíssimi,  
Lumen, Deus, de Lúmine,  
Tibi, Redemptor glória,  
Honor, potestas régia.

**Tu** solus ante sæcula  
Spes atque centrum témporum,  
Cui jure sceptrum géntium  
Pater suprénum crédidit.

**Tu** flos pudicæ Virginitis,  
Nostræ caput propáginis,  
Lapis cadúcus vértice

Ac mole terras óccupans.

**Diro** tyránno súbdita,  
Damnáta stirps mortálium,  
Per te refrégit víncula  
Sibíque cælum vindicat.

**Doctor, Sacerdos, Légifer**  
Præfers notátum sáanguine  
In veste « Princeps principum  
Regúmque Rex Altíssimus ».

**Tibi** voléntes súbdimur,  
Qui jure cunctis ímperas:  
Hæc civium beátitas  
Tuis subesse légibus.

**Glória** tibi, Dómine,  
Qui sceptra mundi témperas,  
Cum Patre, et almo Spíritu,  
In sempitérna sæcula. Amen.

### In I Nocturno

**Aña** Ego autem † constitútus sum  
Rex ab eo super Sion montem sanctum  
ejus, prædicans præceptum ejus.

### Psalmus 2



**Q**UARE fremuérunt gentes: \*  
et pópuli meditáti sunt iná-  
nia?

Astitérunt reges terræ, et príncipes  
convenérunt in unum \* advérsus  
Dóminum, et advérsus Christum ejus.

Dirumpámus víncula eórum: \* et  
proiciámus a nobis jugum ipsórum.

Qui hábitat in cælis, irridébit eos: \*  
et Dóminus subsannábit eos.

Tunc loquétur ad eos in ira sua, \* et

in furóre suo conturbábit eos.

Ego autem constitútus sum Rex ab eo super Sion montem sanctum ejus, \* prædicans præcéptum ejus.

Dóminus dixit ad me: \* Filius meus es tu, ego hódie génui te.

Póstula a me, et dabo tibi gentes hereditátem tuam, \* et possessioném tuam téminos terræ.

Reges eos in virga férrea, \* et tamquam vas figuli confrínges eos.

Et nunc, reges, intelligite: \* erudímini, qui judicátis terram.

Servíte Dómino in timóre: \* et exsultáte ei cum tremóre.

Apprehéndite disciplínam, nequándo irascátur Dóminus, \* et pereátis de via justa.

**Añā** Ego autem constitútus sum Rex ab eo super Sion montem sanctum ejus, prædicans præcéptum ejus.

**Añā** Glória † et honóre coronásti eum, Dómine: ómnia subjecísti sub pédibus ejus.

### Psalmus 8

**D**ÓMINE, Dóminus noster, \* quam admirábile est nomen tuum in univérsa terra!

Quóniam eleváta est magnificéntia tua, \* super cælos.

Ex ore infántium et lacténtium perfecísti laudem propter inimícos tuos, \* ut déstruas inimícum et ultórem.

Quóniam vidébo cælos tuos, ópera dignitórum tuórum: \* lunam et stellas,

quæ tu fundásti.

Quid est homo quod memor es ejus? \* aut filius hóminis, quóniam vísitas eum?

Minuísti eum paulo minus ab Ángelis, † glória et honóre coronásti eum: \* et constituísti eum super ópera mánuum tuárum.

Ómnia subjecísti sub pédibus ejus, † oves et boves univérsas: \* insuper et pécora campi.

Vólucres cæli, et pisces maris, \* qui perámbulant sémitas maris.

Dómine, Dóminus noster, \* quam admirábile est nomen tuum in univérsa terra!

**Añā** Glória et honóre coronásti eum, Dómine: ómnia subjecísti sub pédibus ejus.

**Añā** Elevámini, † portæ æternáles, et introíbit Rex glóriæ.

### Psalmus 23

**D**ÓMINI est terra, et plenitúdo ejus: \* orbis terrárum, et univérsi qui hábitant in eo.

Quia ipse super mária fundávit eum: \* et super flúmina præparávit eum.

Quis ascéndet in montem Dómini? \* aut quis stabit in loco sancto ejus?

Ínnocens mánibus et mundo corde, † qui non accépit in vano ánimam suam, \* nec jurávit in dolo próximo suo.

Hic accípiet benedictiónem a Dómino: \* et misericórdiam a Deo, salutári suo.

Hæc est generatio quærentium eum,  
\* quærentium faciē Dei Jacob.

Attollite portas, principes, vestras, †  
et elevāmini, portæ æternāles: \* et in-  
troibit Rex glóriæ.

Quis est iste Rex glóriæ? † Dóminus  
fortis et potens: \* Dóminus potens in  
prælio.

Attollite portas, principes, vestras, †  
et elevāmini, portæ æternāles: \* et in-  
troibit Rex glóriæ.

Quis est iste Rex glóriæ? \* Dóminus  
virtutum ipse est Rex glóriæ.

**Añā** Elevāmini, portæ æternāles, et  
introibit Rex glóriæ.

**Añā** Sedēbit † Dóminus Rex in ætér-  
num: Dóminus benedicet pópulo suo  
in pace.

### Psalmus 28

**A**FFÉRTE Dómino, filii Dei: \* afférte  
Dómino filios arietum.

Afférte Dómino glóriam et honórem,  
† afférte Dómino glóriam nómini ejus:  
\* adoráte Dóminum in átrio sancto  
ejus.

Vox Dómini super aquas, † Deus  
majestátis intónuit: \* Dóminus super  
aquas multas.

Vox Dómini in virtúte: \* vox Dómini  
in magnificéntia.

Vox Dómini confringéntis cedros: \*  
et confrínget Dóminus cedros Líbani:

Et commínet eas tamquam vítulum  
Líbani: \* et diléctus quemádmódum  
filius unicórnium.

Vox Dómini intercidéntis flammam  
ignis: † vox Dómini concutiéntis  
desértum: \* et commovébit Dóminus  
desértum Cades.

Vox Dómini præparántis cervos, et  
revelábit condénsa: \* et in templo ejus  
omnes dicent glóriam.

Dóminus dilúvium inhabitáre facit: \*  
et sedēbit Dóminus Rex in ætérnum.

Dóminus virtútem pópulo suo dabit:  
\* Dóminus benedicet pópulo suo in  
pace.

**Añā** Sedēbit Dóminus Rex in ætér-  
num: Dóminus benedicet pópulo suo  
in pace.

**Añā** Virga directiónis, † virga regni  
tui: propterea pópuli confitebúntur  
tibi in ætérnum, et in sáeculum sáeculi.

### Psalmus 44

**E**RUCTÁVIT cor meum verbum  
bonum: \* dico ego ópera mea  
Regi.

Lingua mea cálamus scribæ: \*  
velóciter scribéntis.

Speciósus forma præ filiis hóminum,  
† diffúsa est grátia in lábiis tuis: \*  
propterea benedixit te Deus in ætér-  
num.

Accingere gládio tuo super femur  
tuum, \* potentissime.

Spécie tua et pulchritúdine tua: \* in-  
tēde, prospere procéde, et regna.

Propter veritátem, et man-  
suetúdinem, et justítiam: \* et dedúcet  
te mirábiliter dextera tua.

Sagittæ tuæ acutæ, pópuli sub te cadent: \* in corda inimicórum Regis.

Sedes tua, Deus, in sæculum sæculi: \* virga directiónis virga regni tui.

Dilexisti justitiam, et odisti iniquitatem: \* propterea unxit te Deus, Deus tuus, óleo lætitiæ præ consórtibus tuis.

Myrrha, et gutta, et cásia a vestiméntis tuis, a dómibus ebúrneis: \* ex quibus delectavérunt te filiæ regum in honóre tuo.

Ástitit regína a dextris tuis in vestitu deaurato: \* circúmdata varietáte.

Audi filia, et vide, et inclína aurem tuam: \* et obliviscere pópulum tuum et domum patris tui.

Et concupíscet Rex decórem tuum: \* quóniam ipse est Dóminus Deus tuus, et adorábunt eum.

Et filiæ Tyri in munéribus \* vultum tuum deprecabúntur: omnes dívites plebis.

Omnis glória ejus filiæ Regis ab intus, \* in fimbriis áureis circumamícta varietátibus.

Adducéntur Regi vírgines post eam: \* próximæ ejus afferéntur tibi.

Afferéntur in lætítia et exultatióne: \* adducéntur in templum Regis.

Pro pátribus tuis nati sunt tibi filii: \* constitúes eos príncipes super omnem terram.

Mémores erunt nóminis tui: \* in omni generatióne et generatióne.

Propterea pópuli confitebúntur tibi in ætérnum: \* et in sæculum sæculi.

**Aña** Virga directiónis, virga regni tui: propterea pópuli confitebúntur tibi in ætérnum, et in sæculum sæculi.

**Aña** Psállite † Regi nostro, psállite: quóniam Rex magnus super omnem terram.

### Psalmus 46

**O**MNES gentes, pláudite mánibus: \* jubilate Deo in voce exultatiónis.

Quóniam Dóminus excélsus, terríbilis: \* Rex magnus super omnem terram.

Subjécit pópulos nobis: \* et gentes sub pédibus nostris.

Elégit nobis hereditátem suam: \* spéciem Jacob, quam diléxit.

Ascéndit Deus in júbilo: \* et Dóminus in voce tubæ.

Psállite Deo nostro, psállite: \* psállite Regi nostro, psállite.

Quóniam Rex omnis terræ Deus: \* psállite sapiénter.

Regnabit Deus super gentes: \* Deus sedet super sedem sanctam suam.

Príncipes populórum congregáti sunt cum Deo Ábraham: \* quóniam dii fortes terræ veheménter eleváti sunt.

**Aña** Psállite Regi nostro, psállite: quóniam Rex magnus super omnem terram.

**℣.** Dáta est mihi omnis potéstas. **℟.** In cælo et in terra.

De Epistola beāti Pauli Apóstoli ad  
Colossenses

Lectio i

Cap. 1, 3-23



**G**RÁTIAS agimus Deo, et Patri  
Dómini nostri Jesu Christi,  
semper pro vobis orántes,  
audiéntes fidem vestram in Christo  
Jesu, et dilecciónem quam habétis in  
sanctos omnes, propter spem, quæ  
repósita est vobis in cælis, quam  
audístis in verbo veritátis Evangélii,  
quod pervénit ad vos, sicut et in uni-  
vérso mundo est, et fructificat, et  
crescit, sicut in vobis, ex ea die, qua  
audístis, et cognovístis grátiam Dei in  
veritáte, sicut didicístis ab Epáphra,  
caríssimo consérvo nostro, qui est  
fidélis pro vobis mínister Christi Jesu,  
qui étiam manifestávit nobis dilec-  
tiónem vestram in spíritu.

**R.** Super sólium † David et super  
regnum ejus sedébit in ætérnum: \*  
Et vocábitur nomen ejus Deus, For-  
tis, Princeps pacis. **V.** Multiplicábitur  
ejus impérium, et pacis non erit finis.  
**Et** vocábitur.

Lectio ii

**I**DEO et nos ex qua die audívimus,  
non cessámus pro vobis orántes,  
et postulántes ut impleámini agni-  
tiónē voluntátis ejus, in omni sapién-  
tia et intelléctu spiritáli; ut ambulétis  
digne Deo per ómnia placéntes; in  
omni ópere bono fructificántes, et  
crescéntes in sciéntia Dei: in omni

virtúte confortáti secúndum potén-  
tiam claritátis ejus, in omni patien-  
tia et longanimitáte cum gáudio; grá-  
tias agéntes Deo Patri, qui dignos nos  
fecit in partem sortis sanctórum in  
lúmine, qui erípuit nos de potestáte  
tenebrárum, et tránstulit in regnum  
Fílii dilecciónis suæ, in quo habémus  
redemptiónem per ságuinem ejus,  
remissiónem peccatórum.

**R.** Aspiciébam † in visu noctis, et  
ecce in núbibus cæli Fílius hóminis  
veniébat: et datum est ei regnum et  
honor: \* Et omnis pópulus, tribus et  
linguæ sèrvient ei. **V.** Potéstas ejus,  
potéstas ætérna, quæ non auferétur:  
et regnum ejus, quod non corrupé-  
tur. **Et** omnis.

Lectio iii

**Q**UI est imágo Dei invisibilis, pri-  
mogénitus omnis creatúræ; quón-  
iam in ipso cón dita sunt univér sa in  
cælis et in terra, visibília, et invisi-  
bília, sive Throni, sive Dominatiónes,  
sive Principátus, sive Potéstates: óm-  
nia per ipsum et in ipso creáta sunt:  
et ipse est ante omnes, et ómnia in  
ipso constant. Et ipse est caput cór-  
poris Ecclesiæ, qui est princípium, pri-  
mogénitus ex mórtuis, ut sit in óm-  
nibus ipse primátum tenens; quia in  
ipso compláuit omnem plenitúdinem  
inhabitáre, et per eum reconciliáre  
ómnia in ipsum, pacíficans per sán-  
guinem crucis ejus, sive quæ in terris,  
sive quæ in cælis sunt.

**R̃.** Tu Bétlehem † Ephrata, párvulus in mǐllibus Juda: ex te mihi egrediétur qui sit dominátor in Israēl: \* Et erit iste Pax. **Ÿ.** Egréssus ejus ab iníitio, a diébus æternitátis: stabit, et pascet in fortitúdine Dómini. **Et** erit.

### Lectio iv

**E**T vos, cum essétis aliquándō alienáti, et inimíci sensu in opéribus malis; nunc autem reconciliávit in córpore carnis ejus per mortem, exhibére vos sanctos, et immaculátos, et irreprensíbiles coram ipso; si tamen permanétis in fide fundáti, et stábiles, et immóbiles a spe evangéllii, quod audístis, quod prædicátum est in univérſa creatúra quæ sub cælo est, cujus factus sum ego Paulus mínister.

**R̃.** Exsúlta † satis, filia Sion; iúbila, filia Jerúsalem: ecce Rex tuus véniet tibi justus et Salvátor: \* Et loquétur pacem géntibus. **Ÿ.** Potéstas ejus a mari usque ad mare: et a flumínibus usque ad fines terræ. **Et** loquétur. **Glória Patri. Et** loquétur.

### In II Nocturno

**Añā** Hic est Deus, † Deus noster in ætérnum: ipse reget nos in sæcula.

### Psalmus 47



**M**AGNUS Dóminus, et laudábilis nimis \* in civitatē Dei nostri, in monte sancto ejus.

Fundátur exsultatíone univérſæ terræ mons Sion, \* látera Aquilónis, civitas Regis magni.

Deus in dómibus ejus cognoscétur: \* cum suscípiet eam.

Quóniam ecce reges terræ congregáti sunt: \* convenérunt in unum.

Ipsi vidéntes sic admiráti sunt, † conturbáti sunt, commóti sunt: \* tremor apprehéndit eos.

Ibi dolóres ut parturiéntis: \* in spíritu veheménti cónteres naves Tharsis.

Sicut audívimus, sic vídimus in civitatē Dómini virtútum, † in civitatē Dei nostri: \* Deus fundávit eam in ætérnum.

Suscépimus, Deus, misericórdiam tuam, \* in médio templi tui.

Secúndum nomen tuum, Deus, sic et laus tua in fines terræ: \* justítia plena est dextera tua.

Lætétur mons Sion, et exsúltent filiæ Judæ: \* propter judícia tua, Dómine.

Circúmdate Sion, et complectímmini eam: \* narráte in túrribus ejus.

Pónite corda vestra in virtúte ejus: \* et distribúite domos ejus, ut enarrétis in progénie áltera.

Quóniam hic est Deus, Deus noster in ætérnum et in sæculum sæculi: \* ipse reget nos in sæcula.

**Aña** Hic est Deus, Deus noster in ætérnum: ipse reget nos in sæcula.

**Aña** Benedicéntur † in ipso omnes tribus terræ; omnes Gentes magnificábunt eum.

### Psalmus 71

**D**EUS, iudícium tuum regi da: \* et justítiam tuam filio regis:

Judicáre pópulum tuum in justítia, \* et páuperes tuos in iudicio.

Suscípiant montes pacem pópulo: \* et colles justítiam.

Judicábit páuperes pópuli, et salvos faciet filios páuperum: \* et humiliábit calumniatórem.

Et permanébit cum sole, et ante lunam, \* in generatióne et generatióne.

Descéndet sicut plúvia in vellus: \* et sicut stillicidia stillántia super terram.

Oriétur in diébus ejus justítia, et abundántia pacis: \* donec auferátur luna.

Et dominábitur a mari usque ad mare: \* et a flúmine usque ad términos orbis terrárum.

Coram illo prócident Æthiopes: \* et inimíci ejus terram lingent.

Reges Tharsis, et ínsulæ múnera offerent: \* reges Árabum et Saba dona addúcent.

Et adorábunt eum omnes reges terræ: \* omnes gentes sérvient ei:

Quia liberábit páuperem a poténite: \* et páuperem, cui non erat adjútor.

Parcet páuperi et ínopi: \* et ánimas páuperum salvas faciet.

Ex usúris et iniquitáte rédimet ánimas eórum: \* et honorábile nomen eórum coram illo.

Et vivet, et dábitur ei de auro Arábiæ, † et adorábunt de ipso semper: \* tota die benedícet ei.

Et erit firmaméntum in terra in summis móntium, † superextollétur super Líbanum fructus ejus: \* et florébunt de civitáte sicut fænum terræ.

Sit nomen ejus benedíctum in sæcula: \* ante solem pérmanet nomen ejus.

Et benedicéntur in ipso omnes tribus terræ: \* omnes gentes magnificábunt eum.

Benedíctus Dóminus, Deus Israël, \* qui facit mirabília solus:

Et benedíctum nomen majestátis ejus in ætérnum: † et replébitur majestáte ejus omnis terra: \* fiat, fiat.

**Aña** Benedicéntur in ipso omnes tribus terræ; omnes Gentes magnificábunt eum.

**Aña** Dícite † in géntibus quia Dóminus regnávít; ipse judicábit orbem terræ in æquitáte, et pópulos in veritáte sua.

### Psalmus 95

**C**ANTÁTE Dómino cánticum novum: \* cantáte Dómino, omnis terra.

Cantáte Dómino, et benedícite nómini ejus: \* annuntiáte de die in



diem salutāre ejus.

Annuntiāte inter gentes glóriam ejus, \* in ómnibus pópulis mirabilia ejus.

Quóniam magnus Dóminus, et laudábilis nimis: \* terribilis est super omnes deos.

Quóniam omnes dii géntium dæmónia: \* Dóminus autem cælos fecit.

Confessio, et pulchritúdo in conspectu ejus: \* sanctimónia et magnificéntia in sanctificatióne ejus.

Afférte Dómino, pátriæ géntium, † afférte Dómino glóriam et honórem: \* afférte Dómino glóriam nómini ejus.

Tóllite hóstias, et introíte in átria ejus: \* adoráte Dóminum in átrio sancto ejus.

Commovéatur a fácie ejus univérsa terra: \* dicite in géntibus quia Dóminus regnāvit.

Étenim corréxit orbem terræ qui non commovébitur: \* judicábit pópulos in æquitáte.

Læténtur cæli, et exsúltet terra: † commoveátur mare, et plenitúdo ejus: \* gaudébunt campi, et ómnia quæ in eis sunt.

Tunc exsultábunt ómnia ligna silvárum a fácie Dómini, quia venit: \* quóniam venit judicāre terram.

Judicábit orbem terræ in æquitáte, \* et pópulos in veritáte sua.

**Añā** Dicite in géntibus quia Dóminus regnāvit; ipse judicábit orbem terræ in æquitáte, et pópulos in veritáte sua.

**Añā** Dóminus † regnāvit, exsúltet terra: læténtur ínsulæ multæ.

### Psalmus 96

**D**ÓMINUS regnāvit, exsúltet terra: \* læténtur ínsulæ multæ.

Nubes, et caligo in circúitu ejus: \* justítia, et judícium corréctio sedis ejus.

Ignis ante ípsum præcédet, \* et inflammábit in circúitu inimícos ejus.

Illuxérunt fúlgura ejus orbi terræ: \* vidit, et commóta est terra.

Montes, sicut cera fluxérunt a fácie Dómini: \* a fácie Dómini omnis terra.

Annuntiavérunt cæli justítiam ejus: \* et vidérunt omnes pópuli glóriam ejus.

Confundántur omnes, qui adórant sculptília: \* et qui gloriántur in simulácris suis.

Adoráte eum, omnes Ángeli ejus: \* audivit, et lætáta est Sion.

Et exsultavérunt filiæ Judæ, \* propter judícia tua, Dómine:

Quóniam tu Dóminus Altíssimus super omnem terram: \* nimis exaltátus es super omnes deos.

Qui diligitis Dóminum, odíte malum: † custódit Dóminus ánimas sanctórum suórum, \* de manu peccatóris liberábit eos.

Lux orta est justo, \* et rectis corde lætítia.

Lætámini, justí, in Dómino: \* et confitémini memóriæ sanctificatiónis ejus.

**Aña** Dóminus regnávít, exsúltet terra: læténtur ínsulæ multæ.

**Aña** Jubiláte † in conspéctu regis Dómini, quóniam venit judicáre terram.

### Psalmus 97

**C**ANTÁTE Dómino cánticum novum: \* quia mirabilia fecit.

Salvávít sibi dèxtera ejus: \* et bráccium sanctum ejus.

Notum fecit Dóminus salutáre suum: \* in conspéctu géntium revelávit justítiam suam.

Recordátus est misericórdiæ suæ, \* et veritátis suæ dómui Israë́l.

Vidérunt omnes términi terræ \* salutáre Dei nostri.

Jubiláte Deo, omnis terra: \* cantáte, et exsultáte, et psállite.

Psállite Dómino in cíthara, in cíthara et voce psalmi: \* in tubis ductílibus, et voce tubæ córneæ.

Jubiláte in conspéctu regis Dómini: † moveátur mare, et plenitúdo ejus: \* orbis terrárum, et qui hábitant in eo.

Flúmina plaudent manu, † simul montes exsultábunt a conspéctu Dómini: \* quóniam venit judicáre terram.

Judicábit orbem terrárum in justítia, \* et pópulos in æquitáte.

**Aña** Jubiláte in conspéctu regis Dómini, quóniam venit judicáre terram.

**Aña** Exaltáte † Dóminum Deum nostrum, et adoráte in monte sancto ejus.

### Psalmus 98

**D**ÓMINUS regnávít, irascántur pópuli: \* qui sedet super Chérubim, moveátur terra.

Dóminus in Sion magnus: \* et excélsus super omnes pópulos.

Confiteántur nómini tuo magno: † quóniam terribile, et sanctum est: \* et honor regis judícium díligit.

Tu parásti directiónes: \* judícium et justítiam in Jacob tu fecísti.

Exaltáte Dóminum, Deum nostrum, † et adoráte scabéllum pedum ejus: \* quóniam sanctum est.

Móyses et Aaron in sacerdotíbus ejus: \* et Sámuel inter eos, qui ínvocant nomen ejus

Invocabant Dóminum, et ipse exaudiébat eos: \* in cólúmna nubis loquebátur ad eos.

Custodiébant testimónia ejus, \* et præcéptum quod dedit illis.

Dómine, Deus noster, tu exaudiébas eos: † Deus, tu propítius fuísti eis, \* et ulciscens in omnes adinventiónes eórum.

Exaltáte Dóminum, Deum nostrum, † et adoráte in monte sancto ejus: \* quóniam sanctus Dóminus, Deus noster.

**Aña** Exaltáte Dóminum Deum nostrum, et adoráte in monte sancto ejus.

**Ÿ.** Afférte Dómino, familiæ populórum. **Ř.** Afférte Dómino glóriam et impérium.

Ex Litteris Encyclicis Pii Papæ  
undécimi

### Lectio v

Litt. Encycl. Quas primas diei 11  
Decembris 1925



**T**RANSLATA verbi signifi-  
catione Rex appellaretur  
Christus ob summum ex-  
cellentiæ gradum, quo inter omnes  
res creatas præstat atque éminet, jam  
diu communiterque usu venit. Ita  
enim fit, ut regnare is « in mentibus  
hóminum » dicatur non tam ob mentis  
áciem scientiæque suæ amplitúdinem,  
quam quod ipse est Véritas, et ver-  
itatem ab eo mortales haurire atque  
obedienter accipere necesse est; «  
in voluntatibus » item « hóminum  
», quia non modo sanctitati in eo  
voluntatis divínæ perfécta prorsus  
respóndet humanæ intégritas atque  
obtemperatio, sed étiam liberæ vol-  
untati nostræ id permotiône instinc-  
túque suo súbicít, unde ad nobilíssima  
quæque exardescámus. « Córdium »  
dénique « Rex » Christus agnóscitur  
ob ejus « supereminéntem scientiæ  
caritatem » et mansuetúdinem benig-  
nitatemque ánimos alliciéntem: nec  
enim quemquam usque ádeo ab uni-  
versitate géntium, ut Christum Jesum,  
aut amári aliquándo cóntigit aut amá-  
tum iri in pósterum cóntinget.

**R.** Opórtet † illum regnare, quóniam  
omnia subiécit Deus sub pédibus ejus:

\* Ut sit Deus ómnia in ómnibus. **V.**  
Cum subiécta fúerint illi ómnia, tunc  
et ipse Fílius subiécus erit Patri. **Ut**  
sit.

### Lectio vi

**V**ERUM, ut rem préssius ingrediá-  
mur, nemo non videt, nomen  
potestatemque regis, própria quidem  
verbi significatióne, Christo hómini  
vindiciári oportére; nam, nisi quatenus  
homo est, a Patre « potestatem et  
honórem et regnum » accepisse dici  
nequit, quandóquidem Dei Verbum,  
cui éadem est cum Patre substán-  
tia, non potest ómnia cum Patre non  
habére commúnia, proptereaúque ip-  
sum in res creatas univérsas summum  
atque absolutíssimum impérium. Quo  
autem hæc Dómini nostri dignitas et  
potestas fundaménto consistat, apte  
Cyrillus Alexandrinus animadvértit:  
« Omnium, ut verbo dicam, crea-  
turárum dominátum óbtinet, non per  
vim extórtum, nec aliunde invéctum,  
sed esséntia sua et natúra; » scilicet  
ejus principátus illa nítitur unióne  
mirábili, quam hypostáticam appél-  
lant.

**R.** Fecit nos † regnum et sacerdotes  
Deo et Patri suo: \* Ipsi glória et im-  
périum, in sæcula sæculórum. **V.** Ipse  
est primogénitus mortuórum, et prin-  
ceps regum terræ. **Ipsi glória.**

### Lectio vii

**U**NDE conséquitur, non modo  
ut Christus ab Angelis et

homínibus Deus sit adorándus, sed étiam ut ejus império Hóminis, Angeli et hómines páreant et subjécti sint: nempe ut vel solo hypostáticæ uniónis nómine Christus potestátem in univérzas creatúras obtíneat. Jamvéro, ut hujus vim et natúram principátus paucis declarémus, dicere vix áttinet tríplici eum potestáte continéri, qua si carúerit, principátus vix intellegitur. Id ipsum depróptá atque alláta ex sacris Litteris de universáli Redemptóris nostri império testimónia plus quam satis significánt, atque est cathólica fide credéndum, Christum Jesum homínibus datum esse útique Redemptórem cui fidant, at una simul legislatórem cui obédiánt. Ipsum autem evangélia non tam leges condidisse narrant, quam leges condéntem indúcut: quæ quidem præcépta quicúmque servárint, iidem a divíno Magistro, álias áliis verbis, et suam in eum caritátem probatúri et in dilectióne ejus mansúri dicúntur. Judiciáriam vero potestátem sibi a Patre attribútam ipse Jesus Judæis, de Sábbati requiète per mirábilem débilis hóminis sanatióne violáta criminántibus, denúntiat: « Neque enim Pater iúdicat quemquam, sed omne iudícium dedit Fílio ». In quo id étiam comprehénditur (quóniam res a iudício disiúngi nequit) ut præmia et pœnas homínibus adhuc vivéntibus jure suo déferat. At præterea potes-

tas illa, quam exsecutiónis vocant, Christo adjudicánda est, útpote cujus império parére omnes necesse sit, et ea quidem denuntiáta contumácibus irrogatióne suppliciórum, quæ nemo possit effúgere.

**R.** Factum est † regnum hujus mundi Dómini nostri et Christi ejus:  
 \* Et regnabit in sæcula sæculórum.  
**Ÿ.** Adorábunt in conspéctu ejus univérse familiæ géntium; quóniam Dómini est regnum. **Et** regnabit.

### Lectio viii

**V**ERÚMTAMEN eiúsmodi regnum præcípua quodam modo et spirituále esse et ad spirituália pertinére, cum ea, quæ ex Bibliis supra protulimus, verba planissime osténdunt, tum Christus Dóminus sua agéndi ratióne confirmat. Síquidem, non una data occasióne, cum Judæi, immo vel ipsi Apóstoli, per errórem censérent, fore ut Messías pópulum in libertátem vindicáret regnúnque Israël restitúeret, vanam ipse ac spem adímere et convéllere; rex a circumfúsa admirántium multitúdine renuntiándus, et nomen et honórem fugiéndum latendóque detrectáre; coram Præsidente Románo edicere, regnum suum « de hoc mundo » non esse. Quod quidem regnum tale in evangéliis propónitur, in quod hómines pœniténtiam agéndo ingredi vero néqueant nisi per fidem et baptismum, Oppónitur únice regno Sátanæ

et potestati tenebrarum, et ab ásseclis póstulat, non solum ut, abalienato a divitiis rebúsque terrénis ánimo, morum præferant lenitatem et esúriant sitiántque justítiam, sed étiam ut semetipsos ábnegent et crucem suam tollant. Cum autem Christus et Ecclesiám Redémptor ságuine suo acquisíverit et Sacérdos se ipse pro peccátis hóstiam obtúlerit perpetuóque ófferat, cui non videátur régium ipsum munus utriúsque illús natúram múnemis indúere ac participáre? Túrpiter, ceteróquin, erret, qui a Christo hómíne rerum civílium quarúmlibet impérium abiúdicet, cum is a Patre jus in res creátas absolutíssimum sic obtíneat, ut ómnia in suo arbítrio sint pósita. Itaque, auctoritate Nostra Apostólica, festum Dómini Nostri Jesu Christi Regis instituímus, quotánnis, postrémo mensis Octóbris Domínico die, qui scílicet Omnium Sanctórum celebritatem próxime antecedit, ubique terrarum agéndum. Item præcípimus, ut eo ipso die géneris humáni Sacratíssimo Cordi Jesu dedicatio quotánnis renovétur.

**R.** Decem córnua † quæ vidísti, decem reges sunt. Hi cum Agno pugnábunt, et Agnus vincet illos: \* Quóniam Dóminus dominórum est, et Rex regum. **Ÿ.** Regnávít Dóminus Deus noster omnípotens: gaudeámus et exsultémus, et demus glóriam ei. Quóniam. Glória Patri. Quóniam.

### In III Nocturno

**Aña** Christo † datus est principátus et honor regni: omnis pópulus et tribus et linguæ sérvient ei in ætérnum.

#### Canticum David

1 Par. 29, 10-13



BENEDÍCTUS es, Dómine, Deus Israël, patris nostri, \* ab ætérno in ætérnum.

Tua est, Dómine, magnificéntia, et poténtia, \* et glória, atque victória:

Et tibi laus: \* cuncta enim quæ in cælo sunt, et in terra, tua sunt:

Tuum, Dómine, regnum, \* et tu es super omnes príncipes.

Tuæ divitiæ, et tua est glória: \* tu domináris ómnium,

In manu tua virtus et poténtia: \* in manu tua magnitúdo, et impérium ómnium.

Nunc ígitur, Deus noster, confitémur tibi, \* et laudámus nomen tuum ínclitum.

#### Canticum Annæ

1 Reg. 2, 1-5

**E**XSULTÁVIT cor meum in Dómino, \* et exaltátum est cornu meum in Deo meo.

Dilatátum est os meum super inimícos meos: \* quia lætáta sum in salutári tuo.

Non est sanctus, ut est Dóminus: † neque enim est álius extra te, \* et non est fortis sicut Deus noster.

Nolite multiplicare loqui sublimia, \* gloriantes:

Recedant vetera de ore vestro: † quia Deus scientiarum, Dominus est, \* et ipsi praeprantur cogitationes.

Arcus fortium superatus est, \* et infirmi accincti sunt robore.

Repleti prius, pro panibus se locaverunt: \* et famelici saturati sunt.

Donec sterilis peperit plurimos: \* et quae multos habebat filios, infirmata est.

### Canticum

Ibidem, 6-10

**D**ominus mortificat et vivificat, \* deducit ad inferos et reducit.

Dominus pauperem facit et ditat, \* humiliat et subleuat.

Suscitat de pulvere egenum, \* et de stercore elevat pauperem:

Ut sedeat cum principibus, \* et solium gloriae teneat.

Domini enim sunt cardines terrae, \* et posuit super eos orbem.

Pedes sanctorum suorum servabit, † et impii in tenebris conticescent: \* quia non in fortitudine sua roborabitur vir.

Dominum formidabunt adversarii ejus: \* et super ipsos in caelis tonabit:

Dominus iudicabit fines terrae, † et dabit imperium regi suo, \* et sublimabit cornu Christi sui.

**Añ**a Christo datus est principatus et honor regni: omnis populus et tribus et linguae servient ei in aeternum.

**Ÿ.** Adorabunt eum omnes reges terrae. **R.** Omnes gentes servient ei.

Lectio sancti Evangelii secundum Joannem

### Lectio ix

Cap. 18

**I**n illo tempore: Dixit Pilatus ad Jesum: Tu es Rex Iudaeorum? Respondit Jesus: A temetipso hoc dicis, an alii dixerunt tibi de me? Et reliqua.

Homilia sancti Augustini Episcopi

Tract. 51 in Joan. 12-13; Tract 117 in Joan. 19-21



**Q**uid magnum fuit Regi saeculorum Regem fieri hominum? Non enim Rex Israel Christus ad exigendum tributum vel exercitum ferro armandum hostesque visibiliter debellandos; sed Rex Israel, quod mentes regat, quod in aeternum consulat, quod in regnum caelorum credentes, sperantes amantesque perducat. Dei ergo Filius aequalis Patri, Verbum per quod facta sunt omnia, quod Rex esse voluit Israel, dignatio est, non promotio; miserationis indicium est, non potestatis augmentum. Qui enim appellatus est in terra Rex Iudaeorum, in caelis est Dominus Angelorum. Sed Iudaeorum tantum Rex est Christus, an et gentium? Immo et gentium. Cum enim dixisset in prophetia: Ego autem sum constitutus Rex ab eo super Sion montem sanctum ejus, praedi-

cans præceptum Dómini: ne propter montem Sion solis Judæis eum regem quisquam diceret constitutum, continuo subiécit: Dóminus dixit ad me: Filius meus es tu, ego hódie génui te; póstula a me et dabo tibi gentes hereditátem tuam et possessiónem tuam téminos terræ.

**R.** Tua est † poténtia, tuum regnum, Dómine: tu es super omnes gentes: \*

**V.** Da pacem, Dómine, in diébus nostris. **V.** Creátor ómnium, Deus, terribilis et fortis, justus et miséricors. **Da** pacem.

### Lectio x

Tract. 115 in Joan. 18-36

**R**ESPÓNDIT Jesus: Regnum meum non est de hoc mundo. Si ex hoc mundo esset regnum meum, ministri mei útique decertárent, ut non tráderer Judæis; nunc autem regnum meum non est hinc. Hoc est quod bonus Magíster scire nos vóluit; sed prius nobis demonstránda de regno ejus opínio, sive géntium, sive Judæórum a quibus id Pilátus audierat: quasi proptérea morte fuisset plecténdus, quod illicitum affectáverit regnum, vel quóniam solent regnatúris invidére regnántes, et vidélicet cavéndum erat ne ejus regnum sive Románis, sive Judæis esset advérsus.

**R.** Ecce † appárebit Dóminus super nubem cándidam, \* Et cum eo Sanctórum millia: et habébit in vestiménto, et in fémore suo scriptum: †

Rex regum, et Dóminus dominántium. **V.** Appárebit in finem, et non mentietur; si moram fécerit, exspécta eum, quia véniens véniet. **Et** cum.

### Lectio xi

**P**ÓTERAT autem Dóminus quod ait, Regnum meum non est de hoc mundo, ad primam interrogatióem præsidis respondére, ubi ei dixit, Tu es rex Judæórum? sed eum vicíssim intérogans, utrum hoc a semetípso diceret, an audísset ab áliis, illo respondénte osténdere vóluit hoc sibi apud illum fuisse a Judæis velut crimen obiéctum: patefáciens nobis cogitatióes hóminum, quas ipse nóverat, quóniam vanæ sunt; eisque post responsiónem Piláti, jam Judæis et géntibus opportúnus aptiúsque respóndens, Regnum meum non est de hoc mundo.

**R.** Non est † símilis tui, Dómine, magnus nomen tuum in fortitúdine, \* Quis non timébit te, o Rex géntium?

**V.** Tuum est enim decus inter cunctos sapiéntes géntium: Tu Deus vivens et Rex sempitérnus **Quis**.

Lectio XII de Homilia Dominicæ occurrentis, cum **R.** suo.

Sequéntia sancti Evangélíi secúndum Joánnem

Cap. 18, 33-37



**I**N illo témpore: Dixit Pilátus ad Jesum: Tu es Rex Judæórum? Respóndit Je-

sus: A temetípso hoc dicis, an álíi dixerunt tibi de me? Respóndit Pilátus: Numquid ego Judæus sum? Gens tua et pontífices tradidérunt te mihi: quid fecísti? Respóndit Jesus: Regnum meum non est de hoc mundo. Si ex hoc mundo esset regnum meum, minístri mei útique decertárent, ut non tráderer Judæis: nunc autem regnum meum non est hinc. Dixit itaque ei Pilátus: Ergo Rex es tu? Respóndit Jesus: Tu dicis, quia Rex sum ego. Ego in hoc natus sum et ad hoc veni in mundum, ut testimoniúm perhíbeam veritáti: omnis, qui est ex veritáte, audit vocem meam.

AD LAUDES

et per Horas

**Ant. 1** Suscitábit † Deus cæli regnum quod commínet et consúmet univérsa regna, et ipsum stabit in ætérnum. **Ps. 92** Dóminus regnávít, decórem indútus est, **cum reliquis de Dominica.**

**2** Dedit ei Dóminus † potestátem et honórem et regnum; et omnes pópuli, tribus et linguæ ipsi sérvient.

**3** Exhibunt aquæ vivæ † de Jerúsalem; et erit Dóminus Rex super omnem terram.

**4** Magnificábitur † usque ad términos terræ, et erit iste pax.

**5** Gens et regnum † quod non servíerit tibi, períbít: et gentes solitúdine vastabúntur.

Capitulum

Coloss. 1, 12-13

**F**RATRES: Grátias ágimus Deo Patri, qui dignos nos fecit in partem sortis sanctórum in lúmine, qui erípuit nos de potestáte tenebrárum, et tránstulit in regnum Filii dilectiónis suæ.

**R. br.** Data est mihi \* Omnis potestas. **Data est. V.** In cælo et in terra. Omnis potestas. **Glória Patri. Data est.**

Hymnus

**V**EXÍLLA Christus ínclita  
Late triúmphans éxplicat:  
Gentes adéste súpplices,  
Regique regum pláudite.

**Non** Ille regna cládibus:  
Non vi metúque súbdidit  
Alto levátus stípíte,  
Amóre traxit ómnia.

**O** ter beáta cívitas  
Cui rite Christus ímperat,  
Quæ jussa pergit éxsequi  
Edícta mundo cælitus!

**Non** arma flagrant ímpia,  
Pax usque firmat fœdera,  
Arridet et concórdia,  
Tutus stat ordo cívicus.

**Servat** fides connúbia,  
Juvénta pubet íntegra,  
Pudíca florent límína  
Domésticis virtútibus.

**Optáta** nobis spléndeat  
Lux ista, Rex dulcíssime:  
Te, pace adépta cándida,



Adóret orbis súbditus.

**G**lória tibi, Dómine,  
Qui scepra mundi témperas,  
Cum Patre, et almo Spíritu,  
In sempitérna sæcula. Amen.

**Ÿ.** Multiplicábitur ejus impérium. **R.**  
Et pacis non erit finis.

**Ad Bened.** Aña Fecit nos Deo † et  
Patri suo regnum, primogénitus mor-  
tuórum, et Princeps regum terræ, al-  
lelúja.

### Oratio

**O**MNÍPOTENS sempitérne Deus, qui  
in dilécto Filio tuo, universórum  
Rege, ómnia instauráre voluísti: con-  
céde propítius; ut cunctæ familiæ gén-  
tium, peccáti vúlnerē disgregátæ, ejus  
suavíssimo subdántur império: Qui  
tecum vivit.

**Et fit Commemoratio Dominicæ occurren-  
tis.**

### AD TERTIAM

**Capitulum ut supra ad Laudes.**

**Ÿ.** Afférte Dómino, familiæ pop-  
ulórum. **R.** Afférte Dómino glóriam  
et impérium.

### AD SEXTAM

**Capitulum Coloss. 1, 16-17**

**O**MNIA per ipsum et in ipso creáta  
sunt, et ipse est ante omnes,  
et ómnia in ipso constant. Et ipse  
est caput córporis Ecclesiæ, qui est

príncípium, primogénitus ex mórtuis,  
ut sit in ómnibus ipse primátum  
tenens.

**Ÿ.** Adorábunt eum omnes reges  
terræ. **R.** Omnes gentes sérvient ei.

### AD NONAM

**Capitulum Coloss. 1, 19-20**

**I**n ipso complácuit omnem plen-  
itúdinem inhabitáre, et per eum  
reconciliáre ómnia in ipsum, pacífi-  
cans per sánguinem crucis ejus sive  
quæ in terris, sive quæ in cælis sunt,  
in Christo Jesu Dómino nostro.

**Ÿ.** Multiplicábitur ejus impérium. **R.**  
Et pacis non erit finis.

### IN II VESPERIS

**Omnia ut in I Vesperis, præter sequentia:**

**Ÿ.** Multiplicábitur ejus impérium. **R.**  
Et pacis non erit finis.

**Ad Magnif.** Aña Habet in ves-  
timénto † et in fémore suo scrip-  
tum: Rex regum, et Dóminus dom-  
inántium. Ipsi glória et impérium, in  
sæcula sæculórum.

**Et fit Commemoratio Dominicæ occurren-  
tis.**

Si ultima Dominica occurrat die 31 Oc-  
tobris, Vesperæ dicuntur de sequenti Festo  
Omnium Sanctorum cum Commemora-  
tione Festi D. N. Jesu Christi Regis et Do-  
minicæ.